

U cilju ostvarenja efikasnosti u radu oba suda i ujednačavanja sudske prakse, Općinski sud u Žepču i Kantonalni sud u Zenici zaključuju **Memorandum o saradnji**, kojim su se sporazumjeli kako slijedi:

I

Potpisnice Memoranduma su saglasne da je cilj saradnje ujednačavanje sudske prakse, jačanje autoriteta suda, brže i ekonomičnije rješavanje sudskih postupaka sa krajnjim ciljem, a to je pravna sigurnost, uz maksimalno očuvanje nezavisnosti u radu oba suda i sudija.

II

Potpisnice Memoranduma su saglasne da se saradnja odvija na sljedeći način:

- održavanjem sastanaka predstavnika oba suda,
- Kantonalni sud u Zenici će na web stranici objavljivati odluke, pravna shvatanja i stavove za koje bude smatrao da su od značaja za rad Općinskog suda u Žepču,
- delegiranje tzv. „pilot predmeta“.

III

Sastanci predstavnika sudova će se održavati dva puta godišnje (po potrebi i češće), u prvoj ili drugoj polovini godine. Sastancima će prethoditi pitanja blagovremeno upućena od strane Općinskog suda u Žepču, a koji se tiču spornih pravnih pitanja, procesne ili materijalne prirode. Predstavnici sudova će se upoznati sa pojavom novih vrsta predmeta, pojavom različitih odluka oba suda povodom istih pitanja sa ciljem prevencije nastupanja takvih pojava, kao i drugim problemima u radu na pojedinim predmetima. O sastancima će se sačinjavati pisani Zapisnici o kojima će Predsjednici odjeljenja oba suda upoznati sudije.

IV

Kantonalni sud u Zenici će na web stranici objavljivati odluke, pravna shvatanja i stavove za koje bude smatrao da su od značaja za rad Općinskog suda u Žepču, uključujući i odluke kojima se rješava predmet nekog drugog suda sa područja Zeničko-dobojskog kantona, a kojima Općinski sud u Žepču nema pristup putem CMS sistema. Postupajući na ovakav način omogućit će se brzo i efikasno upoznavanje sa odlukama, pravnim shvatanjima i stavovima drugostepenog suda, kako sudija tako i učesnika u parničnom postupku.

V

Potpisnice Memoranduma su saglasne da će u slučaju pojave većeg broja predmeta sa istom ili sličnom činjeničnom i pravnom osnovom, Općinski sud u Žepču delegirati Kantonalnom sudu u Zenici „pilot predmet“ o kojem će drugostepeni sud odlučiti u zakonom propisanom roku, te isti vratiti prvostepenom sudu. Cilj ovakve saradnje je ujednačavanje u postupanju oba suda i postizanje veće pravne sigurnosti.

VI

Potpisnice Memoranduma su saglasne da će u daljem radu nastaviti poštovati procesnu disciplinu u skladu sa odredbama Zakona o parničnom postupku, te Smjernicama za postupanje u prvostepenom parničnom postupku, jačati kvalitet i usaglašenost sudskih odluka, sa ciljem jačanja povjerenja javnosti u rad pravosuđa.

VII


Potpisnice Memoranduma su saglasne da će se odnos saradnje i dalje razvijati te se obavezuju na kontinuirano djelovanje u tom pravcu.

VIII

Ovaj Memorandum stupa na snagu danom potpisivanja od strane ovlaštenih predstavnika oba suda. Zaključuje se na neodređeno vrijeme, sa mogućnošću zaključenja Aneksa istog.

Memorandum je zaključen u 4 (četiri) istovjetna primjerka, po 2 (dva) za svaku Potpisnicu.


za Kantonalni sud u Zenici
Predsjednica suda
Snježana Čolaković



Broj: 004-0-SuDp-20-000225*
Zenica, 17.03.2020. godine



za Općinski sud u Žepču
Predsjednica suda
Dragica Dragičević



Broj: 044-0-Su-20-000058
Zenica, 17.03.2020. godine

